



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

### Anti-graft body-i Sharif anema ken o benok

TAPAK 7

### PM-i yimjak nung China aitsütsüla: Kapil Sibal



VOL. XVII NO. 241 (ADOK 241) DIMAPUR

AMUNGNÜ (SUNDAY) AAMI (JUNE) 28, 2020

₹ 5.00

## COVID-19 Nagaland: Police 9 dena nisung 16 dak putet

**Kohima, June 27 (TYO):** Nagaland nung Honibarnü nisung 16 dak COVID-19 putetba züngsema nisung ajak agi 387 kümogo.

Tang tashi nisung 164 taneptsü nguogo aser parnok 223 mozü ki balala nung anepaludar.

Sample 422 tendangba nungi sample 16 nung COVID-19 aliba putetogo, ta Health & Family Welfare, S Pangnyu Phom-i metetdaksü.

Tanü putetertem rongnung Mon district nungi 12 aser Dimapur district nungi 4 lir, ta paisa ashi.

"Mon district nung nisung 12 dak COVID-19 putetba nungi parnok 9 ji police lir aser parnok ya district kükob quarantine centre balala nung mapa lemzüka liasü," ta

State Nodal Officer for Integrated Disease Surveillance Programme, Dr Nyan Kikon-i ashi.

Tanü tashi nung COVID-19 anema tongti süa rarartem dak COVID-19 putetbaji nisung 14 lir. Parnok rongnung bus driver 4 aser NHAK nung mapa inyaker ka dena lir, ta Dr Nyan-isa metetdaksü.

Honibarnü Dimapur district nung aliba quarantine centre nung amonger ana dak negative putet aser tena züngsema taneptsü angur ajak agi 164 lir, ta paisa shisem.

Health Department-i Nagaland nung COVID-19 puteta aliba district telemsa agütsüba:

Dimapur - 163, Peren - 86, Kohima - 91, Mon - 35, Tuensang - 8, Zunheboto - 3, Phek - 1

District pezü Mokokchung, Longleng, Kiphire aser Wokha nungbo tanü tashi nisung ka dak danga COVID-19 putetba osang mali.

Nisung 218 rongnung nisung punguji JNV Jalukie COVID Care Centre nung amongertem lir, ta health department-isa metetdaksüogo.

Naga Hospital Authority Kohima (NHAK) nung mapa inyaker ka dak COVID-19 putetba sülen, par kinunger aser health workers 30 indang sample tendangtsü agütsüba ano mangu lir, ta Dr Nyan-isa ashi.

Tanü tashi nung sample 11,158 tendangtsü agütsüba nungi sample 10,197 indang osang nguogo, ta Principal Secretary Home-i metetdaksü.

Sample 7715 tashi Naga Hospital Authority Kohima (NHAK) indang BSL-3 lab nung tendangtsü agütsüba nungi sample 6,981 tendangba nung 316 dak COVID-19 putetogo, ta paisa ashi.

Iba dakji alia Truenat machine tem ajanga sample 4,246 tendangba nungi sample 73 positive ta putetogo aser itemji RT-PCR ajanga jangjatsü yokogo, ta Principal Secretary Home-isa metetdaksü.

Tang Nagaland nung nisung 4,290 tashi Facility Quarantine nung mongdar, ta paisa shisem.

## Dimapur nung traffic tetuyuba tasen agütsür

**Dimapur, June 27 (TYO):** COVID-19 wara agi tonga aliba mapang nübortem kümzüka ayutsü nükjidong nung Dimapur nung gari senzisenbongba asoshi tetuyuba kar agüja lir.

Iba dak sendakba nung Commissioner of Police, Dimapur-i May 17, 2020 nü tetuyuba ka agüja aliba June 28, 2020 nungi agientsü, ta Rothithu Tetseo, IPS-i metetdaksüogo.

Dimapur jila nungi Chumoukedima tashi NH 29 nung nungdak maliba garitem mesenzüdaksütsü aser iba tetuyuba ya June 30 nungi tenzüker July 30, 2020 tashi atema asütsü, ta Commissioner of Police, Dimapur, Rothithu-i sangdong ka nung ashi.

### Tetuyubatem:

1. Dimapur Police-i 'ON COVID-19 DUTY' ta ser car pass agütsüba ajak June 28, 2020 nungi agiener.
2. Hombar, Bodbar aser Hokolbar anogotem züngdangba 1,3,5,7 & 9 agi atema registration number aketba garitem dang senzütsü. Mongulbar, Brihostibar aser

Honibar anogotem züngdangba 2,4,6,8 & 0 agi tembangba registration number aketba garitem dang senzütsü.

Iba tenokdangba ya Deobar nungbo malitsü.

3. Taoba mapang 'essential services' ta ser agütsüba kükob densema aliba garitembalenba kecha melii senzütsü. Sorkar maparen/ COVID-19 dak sendakba mapa inyakerterem senzüba garitem iba tenokdangba kükob madentsü aser parnoki nungdakba kulikaketem aser ID proof tejangja agütsütsü. Iba tenokdangba kükob two wheelers madentsü.
4. Four lane yangluba maparen dak sendakba gari tulutem dak alia tanungba gari tulu ajak anepdang 09:00 nungi nikonngtsütsü 03:00 ako town area aser highway area nung mesenzüdaksütsü.

Iba tetuyuba tashi mangartem MV Act 1988 nung U/S 177 aser 179 nung aliba ama temerenshi alitsü, ta Commissioner of Police, Dimapur-isa metetdaksüogo.

## Dimapur nung Bio Safety Laboratory-2 lapokogo



Honibarnü CISHR Dimapur nung Health & Family Welfare Minister, S Pangnyu Phom-i BLS 2 Lab lapoktsüdang agiba noksa angur. (Dimapur, June 27- DPRO Dimapur)

**Dimapur, June 27 (TYO):** Honibarnü Health & Family Welfare Minister, S Pangnyu Phom-i Dimapur nung Bio Safety Laboratory-2 lapoktsüogo.

Iba Lab ya Christian Institute & Health Sciences and Research (CIHSR) nung yanglu aser tanü nungi mapa kuma tenzüko.

"Iba Lab lapokba ajanga Nagaland nung Covid-19 tendangba mapa tuluba inyaktetsü. NHAK nung BLS-3 lab lapokba sülen sample 7715 tendangtsü agütsüba nungi sample 6981 tendangogo" ta Minister Pangnyu-i ashi.

June 27 anepdang 9:00 ako tashi nung nisung 375 dak Covid-19 putetogo aser iba nungi nisung 162 taneptsü anguba sülen 213 mozü ki balala nung anepaludar.

"State sorkar aser talisa medical department-i Nagaland nung alirtem tajungtiba nung yaritsü meranger. Iba tashidak anema inyakba nung tendangba

ya kanga tongtipang lir aser iba jagi state sorkari BSL lab tem amenokba dang masü saka Truenet machine tem alia district ajak nem agütsüogo" ta Minister Pangnyu-i metetdaksü.

State sorkari akokba tashi iba virus azüoktsü meranger. Anogoshia iba tashidak anema tongti süa inyakerterem parnok taküm lendongbang nung yur inyaker, anungji asenoki parnok akhümsübudu aser teinyaktsü tuyubatem sülen anidakdi, ta paisa ayongzüker.

Nagaland nung nisung aika dak Covid-19 puteta arur saka asenok petsaprong masütsüla kechiyong tanga puteta alirtem ya Institutional quarantine centre nung amongertem dang lir aser parnok ya tangalen nungi aruba lir, ta Minister Pangnyu-i ashi.

Tang tashi nungbo asen state nung lokti nung menatepa aoba mali anungji olulu meprokshitsüla aser sorkari agütsüba standard operating procedures (SOPs)

den tetuyubatem sülen anidaktsü ayongzüker, ta paisa shisem.

District hospital, Tuensang nunga BSL-2 lab ka yangludar aser ibaji taküm July ita tatemlem tashi ka nung yangluzüktüsü imlar, ta Minister-isa metetdaksü.

PHED Minister, Jacob Zhimomi-ia ashiba agi, BSL-2 lapokba ajanga pungmang ka asangsang kümogo aser iba mapa nung shilem agir ajak nem tenüngsang agütsür.

Minister Pangnyu Phom anema jembir aika liaka, taoba ita ishika tsüngda pai kanga dang anibelega inyaka arur aser iba atema pa dang pelar, ta Minister Jacob-isa ashi.

Jacob-isa COVID-19 anema tongti süa rarar ajak dang pelaba metetdaksü.

Asenok Naga nungeri iba virus angatetsü memeranger. Asenoki tetenzük nungbo junga inyaker saka lialia mejungi akümer aser ibaji kanga lendong lir, ta paisa shisem.

Tanü lab lapokba sentong nung Power Advisor Tovihoto Ayemi, Sericulture, Excise & Minority Affairs Zhaleo Rio, IPR, SCERT & VG Advisor Toshi Wungtung, MLA Azheto Zhimomi nungertem aden.

CISHR nung lapokba BSL-2 lab nung RT-PCR amshitsü aser iba ya COVID-19 tendangba nung 'gold standard test' lir. RT-PCR ajanga kanga junga tendangteter aser khen nung sample 90 tashi tendangtsü akok.

Iba Lab lapokba ajanga Nagaland nung tendangba maparen tuluba inyaktetsü aser COVID-19 prokshiba azüoktetsü, ta Principal Secretary Home-i sangdong ka nung ashi.

## Nagaland nung shisaluyimba tsütsü mapa inyakba alimai ajiteter

**Dimapur, June 27 (TYO):** Covid-19 wara mapang Nagaland nung Tele/Online education programme tenzüka atema Organisation for Economic Development and Cooperation Education (OEDCE)-i tenüngsang agütsüogo.

India kükob Nagaland state nung school shibangli, radio aser television aser ano internet nung lesson sayutsü tenzüker, ta OECD Education & Skills Today-i metetdaksü.

Directorate of School Education, Nagaland-i Tele/online Education programme tenzüker. Iba maparen mezüngbuba shilem nung Doordarshan Kendra Kohima aser All India Radio Kohima ajanga TV aser Radio education agütsü. Tanabuba

shilem nung Youtube Channel ka ajanga lesson tem sayu.

Harvard Global education Innovation initiative, HundrED, OECD Directorate for Education and Skills aser World Bank Group Education Global Practice yaritepa alima ajungalen shisaluyimba tsütsü mapa inyakba osang bendenba nung Coronavirus wara ya tesem ajungalen education systems asoshi tayongzüker tulu ka lir ta bushitet.

Kaketshir million aika kidang dang amongtsüsa akümba ajanga education policy yanglurtemi class maneni agütsü atema sentongtem yanglua inyaker. Iba dak sendakba nung linüktemi inyakyim balala inyaker aser coronavirus tebilemstü ajanga

education policy yanglurtem kati ka dang nungi angazüka yariteptsüla, ta OECD Education and Skills Today-i metetaksü.

"Iba ama alima nung tongtipang telok kati iba oset züluba ajanga onok ajungmesor aser talila inyaktsü akasodaksür" ta Nagaland School Education nung Principal Director, Shanavas C-i ashi.

Department-i school ajak indang survey ka agir aser iba nung kaketshir kwikati digital education amshir aser kwikati mamshitet ta asüba osang metetsü. Iba osang bendenba sülen onoki parnok asoshi tanga lenmang kar bushitsü. Onoki Nagaland nung kaketshir tanur shia atongtsü meranger, ta Shanavas C-isa metetdaksü.



## CORONAVIRUS WARA ASENOK LONGJEMER AKOKTSÜ ASOSHI -

### Metsü tzü talem agi terok shidokang aser tzü tatsük jembet jema liang

- In collaboration with the Media Cell, RD Department, Nagaland





# DTF & ZCMC den Khehovi-i senden amen



**Dimapur, Aami/June 27 (TYO):** Advisor, Tourism, Art and Culture, Khehovi Yeptho-i Zunheboto district semdanga, DTF aser ZCMC den Deputy Commissioner kidang June 27 nü senden ka menogo.

Züngsemtem den sensaksemba mapang, COVID19 wara pokteter aliba mapang shirnokisa bendanga agüja inyakdar, parnok ajak dang kanga pelaba Advisor-i lemsatsep. Paisa, yimstüngtem nung tangazükba agütsütsü nüngdakba indang jembu, shirnok nem tinyaktsü aser minyaktsütem indang osang tai agütsütsü ana nung lir aser iba ajanga lendong tulu adoktsü

akok, ta ashi. Maneni pai, district Covid hospital nung iba dak sendaka aliba department-i takaratiba nung ventilators pezü amenoktsütsü ta metetdaksü. Tang benoka aliba SoP ya osang tejangja ka magütsü tashi maneni benoka atatsü ta pai ashi. Yakbang nung inyakertem ajungshiba mapang, tia tensa ajak nung longjemer inyaktsü asoshi sorkar tenüng nung pai mepeshia liasü.

Senden lenir Deputy commissioner Peter Lichamoi, Advisor-i mapang agütsüteta aruba den district nung terenemshiba aser tensa asadanga atema pa dang kanga pelaba lemsatsep.

Kasa mapang nung Dy CMO, Dr. K. Akaho Sema-i, osang tejangja agütsüba mapang district-i nisung 428 aruogo aser parnok rongnung nisung 107 quarantine mapang (facility aser kidang) tembangogo. Tang nisung 287 kidang quarantine nung lir. Tang tashi nung sample 499 tendangogo aser item rongnung TRUENAT machine amshia sample 344 aser BSL Kohima nung sample 165 tendangogo aser sample 16 indang osang atadar. Coronavirus agi shiranger asem, shirnok tang district covid hospital nung mungdar parnok asemprongla dak tashidak aliba temaitsü mesayur, ta pai ashi.

# Peren District Legal Team senden amen

**Dimapur, Aami/June 27 (TYO):** Peren District Legal Team senden ka June 26 nü DC Complex, District Hq. Peren nung senden ka menogo. Iba senden ya EAC Ngwalwa, Rumbemo T. Kithan lenisüba kübok agia liasü.

Senden nung EAC Ngwalwa-cum-Legal Team Convener, Rumbemo T. Kithan-i ashiba agi, quarantine facility nung amungertemi aser sorkar tenzükertemi sorkar tetuyuba sülen manidakba dak sendakba

nung temzüng ozüng tsütsü onüktem benoka asateptsü asoshi iba senden ayonger ta ashi.

Senden nung benoka jembiba onüktem rongnung item ya densema liasü:

1. Quarantine Facility tem nung amungertemi sorkar tetuyuba aser SoPs sülen manidakba azüoktsü asoshi legal provision bushitsü.
2. Sorkar tenzükertem nem nongloktsüba mapang takok ngua minyaktetba azüoktsü

asoshi legal provision bushitsü

3. Quarantine Facility nung amungertemi tetuyuba sülen manidakba osang agütsütsü asoshi inyakyim asateptsü.
4. Community Quarantine/Home Quarantine nung amungertem azüoktsü asoshi legal provision bushitsü.
5. Community Quarantine/Home Quarantine achaayangba mapang yimstüng nung ketdangsertem khuret.

# DEF Longleng-i online video tetokteba ayonga agi

**Dimapur, Aami/June 27 (TYO):** International Day against Drugs Abuse and illicit trafficking dak sendakba nung DEF Longleng-i, "Impact of Drugs in Longleng" onük nung ajemdaker open online video tetoktepa ka ayonga agiogo. Online tetoktepa osang ya June 26 nü sangdonga liasü.

Tetokteperem kanga junga tendangba sülen item nisungtem nem takok agüja liasü; mezüngbuba jenjang nung KonaeiShangdok, Kohima, tanabuba, Hom-mei S Phom, Noklangkhong Longleng aser

tasembuba Pangilenla T Phom, Model Colony, Purana Bazar, Dimapur liasü.

Consolation Prize anurtem rongnung, I. Akum Kichu, Sungkomen ward, Mokokchung, K. Chingmei, Yongam village, Longleng, Y. Lehotandet Phom, Shayung ward, Longleng aser Tongpangkumluk Phom, Alayong village, Longleng nung densema liasü.

Takok anur asem nem senpet sen 2500, 1500 aser 1000 agütsütsü aser consolation prize sen 500 (each) nisung pezü nem

agütsütsü.

Mezüngbuba jenjang nung takok anur indang video District Executive Force Longleng indang facebook page nung inoktsüogo. Tetoktepa akoker dang osang tejangjaba agitsü asoshi iba mobile number; 9612411925 nung tongteprateptsü metetdaksüogo.

International day against Drugs Abuse & illicit trafficking anogo nüngtem nung DEF Longleng den district administration-i, lokti tentet balala matsüngda moko agi yangluba oset balala raksaja liasü.

# Peren District ajunga mokdanga ayur

**Dimapur, Aami/June 27 (TYO):** Tanga stata nungi arur aika district kübok facility quarantine mapang tembangba sülen SoP sülen anidaka parnok community/home quarantine asütsü asoshi pei yimstüng/kiyongi yokogo aser ano iba den yakbang nung inyakertem aikati tanga state nungi arurtem anepalur asünung, lokti nung tashidak prokshia meyoktsü mechi jenjang tapet agitsü nüngdaker ta angateter.

Anungji COVID-19 wara takok ngua nokdangtetsü aser nüburtem lendong nung metoktsütsü aser Peren nung alirtem kümzüka toktsütsü atema Deputy Commissioner, Peren, Sentiwapang Aier, NCS-i June 27 nü Peren District ajunga June 30 nü nungi July 5 nü mokdanga ayutsü tetuyuba agütsüogo. District mokdanga aliba mapang medical, police, administration, COVID-19 dak sendakba nung yakbang nung

inyakertem, alu ayimertem aser temelaba agir shirangertem dang senzusenpongtsü asoshi melatsü. Mozü ayokdak dang lapoktsü asoshi melatsü. Ajisüaka Covid mapa nung senzüba mapang nisung ajak face mask asemtsüla, teka mapang shia metsüka alitsüla, hand sanitizer amshitsüla aser maparen ajak tesüngda ita inyaksangshitsüla.

### Tenokdanga

- agütsübatem yamai alitsü:**
1. Nüburtem senzusenpongtsü khenyongi memelatsü
  2. Jurila garitem khenyongi mesenzüdaktsütsü
  3. Shishilemba/dokan ajak shibanga atatsü
  4. Social/political/religious sentongtem agitsü memelatsü
  5. Tasü tama mapang nisung 20 dang adenshitsü melatsü
  6. Lokti sendenba tesemtem nung metzü khenyongi memetsüdaktsütsü aser aibelenra senchi achitsü.



*Sakhi-One Stop Centre (OSC) Mokokchung-i "Stop Domestic Violence against Women" omen nung ajemdaker painting competition sentong ka June 26 nü ayongzüka kaogo aser iba nung takok anur; 1st- Aloto Awomi (Penli Ward, Mokokchung), 2nd- Imtiyala Walling (Kumlong Ward, Mokokchung) aser 3rd - Nyingyuh Chingmak O. Ongh (Artang Ward, Mokokchung) parnok nem senpet agütsüba mapang tangokba noksa nung anur. Mokokchung, June 26, 2020*

# Bhandari Block task force senden menogo

**Dimapur, Aami/June 27 (TYO):** June 26 nü Additional Deputy Commissioner Bhandari conference hall nung COVID-19 dak sendakba nung Bhandari Block task force senden ka menogo. Iba senden ya Tiameren Chang, Additional Deputy Commissioner & chairman (BTF) Bhandari lenisüba kübok agia liasü.

Dr. Riku Khutso, EAC Bhandari-i, Quarantine centre nung munga alir parnok 35 Bhandari nung anogo 14 Institutional Quarantine mapang tembangba sülen kidang quarantine asütsü asoshi yokogo, ta metetdaksü.

Senden nung, Bhandari sub-division Quarantine Centers pezü

nung tang tashi kanga takok ngua benoka inyaka aruba inyakyimtem maneni benokda inyaksangshitsü asoshi telemteba agi.

Kasa mapang nung ADC, Bhandari-i, police tem dang Bhandari jila nung check gate asemprongla kanga junga meita atatsü mepeshiba den tenüngdakba oset aser jongkda maparen balala atema senzürtem dak alaka gari atatsü tuyu.Paisa, COVID-19 den raraba mapang nüburtem ajangzüksü asoshi BTF Bhandari züngsemtemi pei akokba tashi tajungtiba inyakba atema parnok ajak dang kanga pelaba lemsatsep.



*Dimapur, Aami/June 26: Tawa anogo ishika tsüngda Tzüdikong Town ajanga temesepba yi shibelener aika NSCN-IM teloki apuba den kulemi Tzüdikong yimsüsürtemia yi shipelener aika pua item yi rongtokba noksatem yangi anur. Tang ama wara tulu tsüputepba mapang tzüma lima alirtem den shibelentepba ajanga asen lendong nung lir ta angateta linuk tenzükertemi nüken arema nübur azüokba atema kangasa pelaba Tzüdikong Yimsusur-i metetdaksü. Talisa arrtsü süngkum anüker teperi lir sünnung temesepba yi yamai shibelentepba ya kanga tebilemtangtsü tulu lir, ta Tzüdikong Yimsusur-i sa metetdaksü.*

# BBBP & MSK-i Longleng nung tanur tetsür asoba benjung

**Dimapur, Aami/June 27 (TYO):** Bati Bachao Bati Padhao (BBBP) District Task Force den Mahila Shakti Kendra (MSK) - DLCW-i District Makeshift hospital Longleng nung tetsür tanur asoba benjungogo. Iba inyakyim ya district nung BBBP aser MSK-i mapa balala maneni inyaka aruba rongnung ka lir.

Phumla WWO lenisüba kübok MSK team aser Tutitungla, Lempong nung lapoka lir.

District Coordinator, MSK-i, tetsür tanurtem nem sempet aser kuli kaket kaka agüja liasü.

MSK team-isa, Phom Baptist Christian Association (PBCA) tetsür teloki achaayangba Covid-19 Community Kitchen semdanga, tetsür 18 shirnoki pei mulungka nung pai mapang agüja bendanga agüja inyaka arudar, parnok nem sempet agüja liasü. Iba sorchiokdak ya PBCA, Lempong nung lapoka lir.





Honibarnü Bharatiya Janata party (BJP) Capital District president Tarh Soping-i Donyi Colony semdangdang agiba noksa angur. Iba kiyong nung tanur tetsür ka anentsüh agi anenbanga asü aser tanü Tarh Soping-i tanutsüla tebu Yura Takhe nem kiojen raksaba atema senotsü teyari agütsü. (Itanagar, June 27)

### Manipur nung COVID-19 aketer ana kilometer 8 jaja

**Imphal, June 27 (Agencies):** Manipur nung COVID-19 aketer ana kilometre 8 tashi jajar ang ambulance atong. Tena ya tangalen nungi tawa state-i arurtem lir aser tena dak COVID-19 putetba sülen ambulance ka tena tani aru. Iba ya Ukhrul district nung atalok aser tena ya Razai Khullen nung lir. Iba tatalokba ajanga Manipur kübok Razai Khullen aser Razai Khunou tsüingda gari lenmang kanga mejungi aliba jungkai adoka sayur.

Ambulance ji tena anitsü atema ao saka tena alidak metongteti kilometre 8 pilar anentsüsa aküm. Jessami Quarantine Centre nung anogo 14 quarantine nung amongba sülen tena indang test osang mangudang Razai Khullen Quarantine Centre nung anogo 14 amongtsü atema yimtsüingi ao. Tena yim atongba sülen anogo ana lir COVID-19 positive ta putet aser iba jagi tena kilometer 8 jaja Razai Khunou tashi ao.

Tzünglu aruba ajanga parnok yimtsüingi aoba lenmang nung gari mesenzüteter. Iba tatalokba ya nisungtem aitsür aser Razai Khullen headman VS Mishivam-i bangdakpurtem dang gari lenmang kanga mejungi aliba reprangshimtsü atema mepishiogo. Iba PMGSY lenmang ya 2015 nung HN Company-i yanglu aser küm pungu tashi parnoki anepalua aruba January 26, 2020 nü iba kümsük tembangogo.

### Galwan rara nung sepai asürtem nem APCC-i tetushi agütsü

**Itanagar, June 27 (Agencies):** Ladakh kübok Galwan Valley nung India aser China sepaitem tsüingda raratepdang Indian Army nungi sepai 20-i taküm bendanga agütsüba atema Arunachal Pradesh Congress Committee (APCC)-i tetushi agütsüogo. Indian National Congress (INC)-i linük ajungalen 'Shaheedon Ko Salam Diwas' campaign ayongzüka amongba nung iba ya shilem ka liasü. Centre nung BJP-i aniba sorkar aser prime minister's office (PMO)-i Galwan Valley indang osang tejangja metetdaksütsüla, ta APCC general secretary &

spokesperson, Mina Toko-i ashi. "China nungur ajak iba tesem nung meindokogo aser parnoki India lushi atsünga agia mali ta Prime Minister Narendra Modi-i linük dang tiyazü osang sangoktsü. Iba sülen PMO-i ochi miimbangtsü atema tatemtsü ka metetdaksü. PMO aser sorkari iba onük atema osang tejangja ashitsüla" ta Toko-isa metetdaksü. China-i Galwan Valley atsünga agiogo ta ashir anungji Centre-i kechiba iba atema mejembir, ta paisa asüingdang. "Galwan Valley ya India lushi nung lir masü nah? China sepaitem idakji lira, ibaji India lushi atsünga agiba masü asü?"

Prime minister-i 'Raj Dharma' sülen anidaksüla aser linük lushi kümzüka ayutsüla" ta laisa shisem. Iba sentong ya milen ka tsükloker tenzüik aser iba sülen APCC züngsemtemi taküm bendanga agütsüba sepaitem nem naro aneokja tetushi agütsü. Iba sentong nung Pradesh Mahila Congress Committee, Youth Congress aser Seva Dal züngsemtem aden. Papum Pare district nunga yashi Sagalee nung kasa sentong ka ayongzüka agi aser iba sentong nung taoba chief minister & APCC president Nabam Tuki aser vice-president Tech Tagi na aden.



Arunachal Pradesh Governor Brig. (Dr.) B.D. Mishra (Retd.)-i Public Health Engineering, water supply aser sanitation maparen meyipa reprangshiba senden ka amendang agiba noksa angur. Iba senden nung PHED Minister Wangki Lowang, den Chief Engineer tem aden aser tzü kümzüka ayutsü, tzünglu tzü bendentsü, tzü tajemtsü agütsütsü aser tzü tanaben merüka amshitsüba onüktem benoka lemsatop. (Itanagar, June 27)

### Tripura nung IPFT züngsem ka tsüingset

**Agartala, June 27 (Agencies):** Tripura kübok Dhalai district nung Waris Ali ta ser IPFT züngsem ka tepset. Gandacherra nung Waris ya par kidang kotari agi tsünger aser tekong rangdang lia angu. ADC elections jakdang political activist ka tepsetba ajanga nisungtem aoksar. Arishi küm 35 tain Waris Ali ya Narayan yimtsüing nungi lir aser Brihostibar aonung tesü nisung ka par kidang ao. Idangji Ali-i pa pelaa agizük aser tena o jembitepdang nisung telok ka Ali'er ki nungpoka tur pa dak teka sangshi, ta osang angazüker.

Police, Tripura Kishore Debbarma-i anir police telok tesem tonga ao. Iba lendong nung Ali kanga mejungi yirur Gandacherra hospital nung anepalutsü atema anir ao saka idak nung jagi GBP hospital-i anir aodang len tom nung asü. IPFT party-i iba mapa inyaker ajak ozüing tapet agi merenshitsu takhangba agütsüogo. Hokolbarnü police den dog squad-i lendong atalokba tesem nung kulitem bushiogo. Ali kinungtsü Salema Bibi-i parnok tenüingbo memetet saka tejak angu nungbo shitetsü ta police dang shiogo. Taoba Assembly election nunga Ali'er ki punguben tashi amak. Iba jagi pa den par kibong aiben kinungtsü'er tsürabur kidang amongtsüsa aküm. "Onoki cell phone records bushitepdar aser iba aonung par kidangi mezüing aoba nisungji metetsü merangdar" ta SP Kishore Debbarma-i ashi.

Iba mapangji Ali dak kotari agi atu aser tekong arang. Kasa mapangji Ali den ajurutepi aosangji jena ao. Ali kinungtsü Salema Bibi-i ola adok saka idangji nisungtem jagi la sota ayutsü merang. Ajisüaka, Bibi jena otet aser Ali tedi'er ki atongba sülen la süchia ao. Iba osang angashiba sülen Dhalai district Superintendent of



Honibarnü Guwahati nung nisungtem ATM kima nung sen agizüktsü atema atatepa angur. Assam sorkari Guwahati nung Covid-19 azüoktsü atema anogo 14 lockdown asütsü atema metetdaksüogo. (Guwahati, June 27)

### Assam QC nung nisung ka sosesetsü merang

**Silchar, June 27 (Agencies):** Assam kübok Cachar district nung quarantine centre nung amonger ka pa sasa sosesetsü merang. Arishi küm 25 tain asangur jagi Silchar nung aliba quarantine centre nungi pa yokang ta ahang saka meyokba atema pa sasa sosesetsü merang. Pai ki azüklen nungi pungzüik aser idangji yiruba sülen Silchar

Medical College and Hospital (SMCH) nung anepalutsü atema anir ao, ta NHM ketdangser kati ashi. Iba nisung yagi quarantine centre nung health ketdangsertem dang pa kidangi meyokra lendongi ajurutsü ta amokmerena liasü. SMCH ketdangsertem dang iba nisung indang tekolok tendangtsü atema shiogo, ta ketdangserisa ashi.

### Arunachal nung ULFA züngsem 4 apu

**Guwahati, June 27 (Agencies):** Assam Rifles sepaitemi Arunachal Pradesh kübok Changra tesem nung United Liberation Front of Asom (ULFA) züngsem pezü apu. Osang tejangja kar angazükba sülen Assam Rifles aser Assam police yaritepa yashi iba tesem mita aodang telungpur pezüji apu. Par pezüji Sargent Major Tiksher Moran (Arjun Asom),

Sargent Major Arup Dowarh (Anchon Asom), Surjeet Dowarh (Khamon Asom) aser SS Sgt Jintu Asom nungertem ta jangjaogo. Par pezü ket nungi prangpong-injanga aika ngtutetogo. Parnok ya Myanmar kübok Taga camp nung training agi aser tashiyim agi sen saruba den tanga mapa tamajung inyaksü atema yokba liasü, ta police-i metetdaksü.





# TIR YIMYIM

## YIMOBILEM (EDITORIAL)

DIMAPUR AMUNGNÜ, AAMI (JUNE) 28, 2020

### Taochi, Yimlibilem aser Tesünep

Tenyar Paul-i Tebu Tsüngrem dang Timoti asoshi Taochi, Yimlibilem aser Tesünep meshija sarasademba olen ka asenoki 1 Timoti 1:2 nung shia angur. Paul-i iba shidi züluba mapang nung, parnoki sayutsüngia jajaba arogotem nung tiyazü tesayurtem aika adoka amangba purtem mangmangdaksüba mapang ka liasü. Iba jagi Timoti kanga shisabolua aliba mapang ka nung, Pauli pa dangi iba shidi zülü ta asenoki angatetter. English nung "Peace" ta asüba ojang ya Ao oshi nungbo tensa dak apet tetezü ana keta ojang tapu ana amshitetter. Ojang anaji, ka 'Yimjung' aser kaji 'Tesünep'. Aji oda, kodang asenoki yimjung nungdakba indang jembidir, yangji telok o telok na mesüra nisung o nisung na tsüngda rara aser meputep lir ta angatetter saka Tesünep nungdakba yabo asenok mulungjang nung shisabolu aser tejashi aliba mapang jembir. Tenyar Paul-i Timoti atema Tsüngrem dang nungdaka sarasademtsüba 'Yimjung' masü saka Tesünep asoshi liasü. Iba kasa Tesünepji asenok den liang ta Yisui Pa alima nungi pilatsü mapang nütsüngtem asoshi sarasademtsüba asenoki Lashiba nung angur. Tanüa asenok asoshi kanga nungdakbaji Tesünep ya lir. Alima nung alir asünungji tangari asenok jashitsüsa inyaker aser shisabolutsüsa tensa tamajung aika ajurur. Iba ama mapang ka nung Tsüngrem taochi aser yimlibilem agi asenok nem tesünep magütsüra, asenok mulung animesüngzükteti teti jashia aliba nisungang ka kumadoktsü. Aji oda, asenok temetetba aika liaka aser rongsen aika kaaka asen mulungjang nung tesünep melira tali meshizük asütsü. Ashiko, tangaribo asenok dang matu ashitsüa akok, kechiyong pi asen dang tamajung inyakaka asenoki mejashir aser takoksa tulu ajurudanga kecha balaka shisamebulur. Tasütsüba lendong ajuru tashi nunga asenoki pelashishia Tsüngrem nem dang tenüngsang agütsür. Ibaji tanga tashi agi masü saka Tsüngremi asenok nem agütsüba Tesünep ajanga lir. Kasa tesünep tashiji tenyartem dak liasü, ibayongji tensa tia ajak nung parnoki Tsüngrem nem dang tenüngsang agütsü aser parnok anema inyaker nem taidok agütsütet. Tanüa asen meketa asen jashitsüsa aika ataloker aser shisabolutsüka tetsübuttsü tashidak wara agi asenok amokmerener. Iba ama mapang ka nung, Paul-i Timoti asoshi sarasademtsüba ama, asenoki kati ka atema Tsüngrem dang Taochi, Yimlibilem aser Tesünep meshija sarasademtsüba kanga tongtibang mapa ka asütsü. Atangji, Tsüngrem nungi Pa taochi ajanga anguba Tesünepji asenok dak tama alitsü nungdaker. Iba jagiang asenoki tesünep nung Tsüngrem dang tangar asoshi tesünep meshija sarasademtsütettsü. Khristan taküm ka asoshi pei asoshi dang sarasademtsüba masü saka tangar asoshi sarasademtsüsbajiang tongtibangba aser jangratemtsüka lir. Asenok asoshi tepelatsüji asenoki Tsüngremi maginütsüsa inyakaka, asenoki dang asen tai nangzükra, pai angati asen dang tai adoker aser temerenshitsü melen tekümtet agütsür. Ibaji Tsüngrem Taochi aser Yimlibilemji lir. Kodang asenoki iba taochi, yimlibilem aser tesünepji asenok dak aliba metetdir, asenok mepelaiang malitsü. Iba jagi asenok dak nungi tetsübu aser shisabolu samadoktsütsü. Iba jagi memetetika, tensa tamajung nunga, asen bang nungi ken adoka atentsü. Atangji, alimaia asenok rongsen mesüra o tajung agi süneptsütsüa akok saka asenok dak Tsüngremi agütsüba Tesünep tanülaji melira asenoki alima tejashi aser shisaboluji mekottettsü. Ibayongji, alima nung takar aser nungtugu nisung aika makaba agi masü saka pei taküm nung tesünep menguteti suseta asür. Yohan 14: 27 nung Yisui ashir, " Ni nenok den Tesünep toktsür, kü Tesünep ni nenok nem agütsür. Alimai agütsüba ama ni nenok nem magütsür, nenok temulung teraksa aser tsüba teli." Yisui alimai arudanga kotak tenyartemi "Nenok den tesünep liang" ta ayimoktsü aser kasa tesünepji Pai alima nungi piladang asenok nem toktsüba kuliji ibai lir. Asenok den Tesünep alitsü nungdakba tetezüji alima nung ali tashi asenok jashitsüsa, shisabolutsüsa aser tsübuttsüsa tensa tia ajurutsü. Item tensa tia koktetsüba hadirji Tsüngremi nungi anguba Tesünepji asütsü. Tenyar Paul ama, asenokia Tsüngrem dang Pa Taochi aser Yimlibilem agi Tesünep lidakjang ta kati ka atema sarasademtsütsüba mapangji tang ya lir.

# OLEMSABANG

## ALAR MULUNGSENTSÜ MELENSHIR LENDENI APUSODI: COVID-19

- Wati Longchar, Serampore

(Yashi adok nungi...)

Taiwan ya Nagaland dang nungi tera agi dang tuluba aser nütsüngbo million 23 tema lir, saka Taiwan ya takar lima rongnung 20 buba nung züngoker. Nagaland dang nungi tenemtema talangba, typhoon mapang shia adoka alu raksatsür aser long onsaraba agi alu sadema ayimtsü kanga tasak. Alu ayimtsü aser development mapa balala inyaksü asoshi Naga nung lushi kanga agi tajungba. Saka koda sür Taiwan takar lima rongnung züngoktsüsa aküm? 1950 küm Taiwan nung kodang tenem nung liasü idangji Gross Domestic Product (GDP) UD \$ 1,400 million dang liasü, saka parnok tenemtsüngleni alua alu yima tenzükerbo noklang aika menden nung tali züsentet - 2016 nungbo US\$ 42,300 million liasü. Taiwan nung kodang tenem nung liasü, iba mapang nüburtem kanga sensaka liasü ta ashir. Saka Governmenti nisung ajak tenemtsünglen (foot hills) yim akümsü ajungshi aser ozüng agütsü. Governmenti tenem nung development asoshi sen meindok, saka tenemtsünglen lenmang, electricity, tzü, mozü ki, school lapokyonga ao, yongji tanem tanemi nüburtem leneni alua yim aküm aser yangji alu ayim, süngjang-lijang lu, ango, shiruru metsüa tenzük. Tenem nung züsentetba dang nungi noklangben agi teimba züsentet, aser chiyungtsü tasen aika züsentet. Akhidang yim kuma aliba lushi ajak nung süngjang lu, süngdong-lidong balala adokdaksü. Sadem sadema alu ayimtsü aser kara senzüsempongtsü asoshi motor cycle lenmang Government-i yanglutsü. Tenem o tenem na tsüngda train aser gari lenmang asoshi tunnel yanglu. Ibai ajanga Taiwan rongsenren jenjang kanga renloka aküm ta ashir. Tanü repringdangra, alima kongsa chiyungtsü peria adokteter iba lima ajakji lenlenen angutsü. Putu melenshiogo anungji Naga nung tenemtsüngleni alutsü nungdak.

Taiwan nung kechisa inyaker ajakji tajung ta ashir masü saka yabo junger aser asen Naga nung atema tapet asütsü ta repringtetba ka lemsatepner. Kü medemer ka Rev. Pai Kwang Sheng ta sür lir. Pa Bunun tribe nungi. Pa ya tsüngtsüker (wheel chair nung dang senzüba nisung ka). Theology azüng aser pastor mapa inyaknu saka arogo aikati pastor mapa sadema meinyaktettsü ta bilema magi. Anungji par yimtak Rev. Sheng-i "Bunun Cultural and Educational Foundation" tenzuka school ka lapoka yangji tesayur inyaksü tenzük.

Rev. Sheng-i tamasa school lapokdang student peria maru, anungji kanga timtema schoolji anübalu. Yimtak nisung ishika dang, talisa tantsür-tambur dang aser school nung mezüngteter kar dak alaka teimba ka town aser city nung oa ali; yimji küm shia tilaba tilaba kuma ao. Saka town aser city-tem nung par yimertemji para ki nung, mesüra ki tilala nung kanga timtema liasü. Karbo yimtaki meyipa aruner saka yimtak mapa mali aser rongsen lenmang peria maliba ajanga arunüka marutet. Yimtak ali, tzü aser mopung tajung, saka nüburtemi city nung timtema alitsü no? Mapa ka inyaksü tim ta bushiteta Rev. Sheng-i yimtsüng nung rongsenren bushiba lenmang nung renloka ora, nüburtem city aser town nung touthia melii yimtaki arua linütsü ta ajitet. Iba nukla nung pai tenemtsüng nung aluyimba, süngjanglijang (cheru, naring, etc) shiruru metsüba (an, ak, nashi) ango metsüba, ninang (bee) and konger (mushroom) farming tenzük. Iba mapang Taiwan Government-ia nüburtem early retirement agirtem nem benefit peria agütsütsü anungji agiang ta ajungshia liasü. Nisung kaji küm 60 nung retire süra, aika tashi (energy) ajema akümer aser mapa tasen tenzuka inyaksü mejangrar, anungji item purji lokti asoshi khuret kaang kumadoktsür. (Asen lima nunga ibala mesükba nübur aika angutsü) Kodang nisung kaji küm 50 shi nung retire südir, tashikadang sodi agir asü nung second career tenzükter aser anema alir asoshibo küm 70-75 tashi mapa inyatetter. Anungji Rev. Sheng-i Bunun nung shirnoksa mapa balala nung inyaka arur retire sür lir mesüra asütsü mapang atonger, parnokji arua yimtak aluyimba aser ola-angla mapa balala sayutsü ajungshi aser sayudaksü. Ibai ajanga yimtak rongsenren kanga renloka aküm. Tanü iba yimtsüng kija nungjagi hopta shia alu nungi aser farm nung adokba truck load 6 tashi Taipei city-i supply asür ta ashi! Business manager, food control officer tashi appoint süa maparen inyaker. Aor shirnok agriculture, horticulture, animal husbandry, fishery, etc zünger Kohima, Mokochung, Dimapur nung retire sür kechianga meinyaki kazüdagi parnoki arua sayutettsü. Experience akar takutet nübu aika Naga nung lir aser itemji koda lokti tajangzük asoshi amshitsü nukla asütsüla.

Kuomintang (KMT party) yimsütsüba mapang Taiwan nung pei tetsü oshi mejembidaksü, Chinese tenung dak alaka pei indigenous tenünga amshitsü memela. Taiwanese indigenous culture yakta sama aotsü ta ajiteta Rev. Sheng-i Taiwanese indigenous art amshia ki, menden, table, etc indigenous style nung modernize süa süng, au (bamboo), long - tulu, tila, temetong, tekerak - ajak amshia indigenous art inoka yim aser agriculture farmland ajak yangluba ajanga yim temeküt ajakji museum tulu ka amai kumadoktsü. Sobaliba wazüka ayuba dang masü, anogo shia tourist aika tereprangi arur aser sobaliba angazükdak yimti ka aküm. Mapang shia iba foundation nung kentener aser tsüngsangertem Governmenti function balala nung hire asür aser alima tesem balalai anir aor. "One China" policy ajanga indigenous culture samadoktsütsü merangba melena Taiwan Government-ia meyiper kanga junger aser tanga kinia (parnok 17 tribes lir) yamaji inyaksü ajungshi.

Taiwan nung dang masü, alima balala nungi tourist aika terepyangi arur asü nung, hotel, restaurant, coffee shop aika lapok, yimti meketa repringa senzüsüatema transportation service agütsü, 12:00-12:45 pm aser 2:30 to 3:15 pmtashi cultural program anaben anogo shia sayur; alu aser farm koda ayimtsü temeket nung aluyimertem nem training mapang shia agütsür; alu aser farm nungi adokba ayoktsü dokan aika lapok, food preservation unit ka lapok, sapon, perfume balala yanglutsü unit ka lapok, dry food processing unit ka lapok, bamboo jarkol yanglutsü unit ka, indigenous art aser ola-angla unit den dokan aika lapok. School tanur 13 nungi dang tenzükba tanübo merijang tema lir. Farm nung dang parnok ishika 4:30 am nung sarasademmer mapa tenzükba, tanübo tenlaki tuluka sür member merijang tema lir. Rev. Sheng aser tebuttsü tena kisüng, teka nung sen kecha mali iba mapa tenzük. Saka tanü iba Bunun Cultural and Educational Foundation nung 199 full time employee aser 44 part time employee lir. Taruba küm tashi nungbo nisung 250 tashi nem employment agütsütsü nukjidong lir. Government nungi tanü tashi kecha teyari magir, saka ita shia 12 million shi angur ta ashi. Tangari inyakteter Aori/Naga nungeri meinyaktettsü na? Inyaktettsü. Ashiko asenok dak tajungba inyaktettsü sempet aser tashi lir. Aser Tsüngremi ali-temo, tsüngküm, mopung tajung moaja lir. Rev. Sheng-i inyakba amaji inyaktet nungbo Nagaland nung unemployment problem malitsü. Nüburtemi Government dak metaloker malitsüla, sen taka nung ali nung dang ta bilemba alar mulungsenttsü indoktsüla. Sen aliyonga temulungtetba, tejangraba melira tamakoktsü.

Iba yimtsüng nung nütsüng renloka aoba, rongsenren renloka aser tesemdang Taiwan aser alima aika nungi aruba ajanga, temuket nunga terenlok bener arutsü. Bank service, train station, fast food/restaurant, hotel, transportation service, food catering service, police station, bazar, dokan, ku mejeba, etc aika lapoka ao. Iba yimtsüng sentakba nungi indirect job generate asüba 1000-1500 shi asütsü ta ashi. Nukla tulu aser tajung yur Aori/Naga nung tenemtsülen alua prokshia lira aser pei akokba aluyimba mapa tasen inyaktetra, Naga nung dang masü India aser asen meküta aliba countrytem nübur ajunga jenjang tajungbai ajungkettsü. Tarutsü lanur asoshi mapa aika generate sütettsü aser Kanan lima ama akümsü. Pei sasa züsenteta achiba aser inyakba nung temulung agüja inyakra Naga lima ya takar akümsü aser ajak mazüngi dang inyaka alitsü, tang amai zünger mapa mangu ta mejanga mekazütsü. Anungji apusodi arung.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# TSÜNGREM NEM TENÜNGSANG AGÜJANG

I Thesalonika 5:18

- Rev. I. Wati

## 1. OKILA:

I Thesalonika 5:18 nungji ajemdaker asenok taküm koba tia nung lidir liaka Tsüngrem nem tenüngsang agütsütsüba indang tangatetba kar lemsateptsü sarasadema tenzüker.

Asenok meimchir tangatetba aser shisatsü onsara tatsü asünung, aiben asenoki tim mapang nunga kati ka yongtsü tenüngsang agütsütepba agi anünga alir aser iba jagi aiben temeimtep, teputep aser yimchung nung meliteti akümer.

Ano meimchir ya Tsüngrem taochi kija agi dang alir sünnung, aser asenoki koba tia ajurudir ajuruaka item ajak nungji na asoshi Tsüngremer sentong tajung lir sünnung, aiben asenoki itemji mangatetdang Tsüngrem nem tenüngsang agütsütsü kuli kecha mengutedi, Tsüngrem den tesendaktep raksar pa tsüngdang sentsütsü akümer, aser Tsüngrem nem tenüngsang magütsüba taküm ka kümer aiben tamakok nung tempanger.

Laishibai "Tia ajak nung tenüngsang agüjang" ta ashiba nungji, junga aliba mapang aser mejungi aliba mapang ajak idakji tena lir. Anungji timtem mapang aser temoatsü mapang ajak nungji tenüngsang agütsüba taküm kaka asütsüba asoshi laishibai sayur. Saka, iba ama pandemic tia pataka nung ya asenok shisabulur, timatemer, tasüba jenti lir, asenok sensak atener, anungji kechi asoshi Tsüngrem nem tenüngsang agütsütsü nungdak ali? ta bilemer.

Saka Laishibai ashir, "Tia ajak nung tenüngsang agüjang, kechiyung nenok asoshi Khrista Yisu nung ya Tsüngremi mulungba lir."

## II. ONÜK TEMANG:

Laishibai tia ajak nung tenüngsang agüjang ta asüba tetezü, mezüng ashi ama, junga alidang aser mejungi alidanga mapang ajak nung, asen mulungjang aser asen tebangmechi sünga Tsüngrem nungsang ola agi sünga alitsüba indang jembir.

Saka tanü tia ama Covid 19 tashitak agi alima ajunga amokmerena arishidang, nisung lakh aika süogo, million aika iba tashitak agi tonger taküm aser tasü tsüngda raradagi, billion aika isolation nung lir aser alima nüburtem ajak aser kibong ajak lockdown sür, kecha meinyakteti pei kidang anogosa anogo shipanger tsübuseta lir. Ano ibala mesükba tia aika nung na timtema alitsü akok. Kari ashitsü südi, kechi asoshi Tsüngrem nem tenüngsang agütsütsü ali?

Saka jungjunga shisadanga tenüngsang agütsütsüba kuli tabensa lir. Asenok khuret agi nungbanger liaka Tsüngrem nem tenüngsang agütsütsüba kulitemji kechisa, aika rongnung tanep ni asenok den kuli pungu shiner.

(1) Mezübuba nung Tsüngrem nem tenüngsang agütsütsü nungdakba kuli kaji, Tsüngremi tetenzük nungi tatempang tashi meteta lir.

Laishibai ashir, Tsüngremji Alpha aser Omega, tetenzük aser tatempang. Tetezü, pai ajak meteta lir aser kesa Tsüngrem shibai ajak meteta ali, iba Tsüngrem jagi asenok dang Tia ajak nung tenüngsang agütsütsü temelaba agütsür.

Anungji tia ajak nung meimchiri Tsüngrem nem tenüngsang agütsütsü Tsüngremer taginüba. Süra, iba ama timtemba tia ka nung alidanga Tsüngrem nem tenüngsang kechiba agütsütsü nungdaker? Iba asoshi kuli aser telangzübajia Pai meteta kar.

I Puti. 16:34 nung ashir, "Kibuba nem tenüngsang agüjang, kechiyung Pa tajung lir, kechiyung pa yimlibilem teti alir."

Anungji iba Covid 19 pandemic tia nung ya-a asenoki Tsüngrem nem tenüngsang agütsütsüba, kechiaser tenüngsang agütsütsüpai mulungba aser asenoki Tsüngremi melaba amaji iba tensa nung alidanga Tsüngrem nem tenüngsang agütsütsüba, iba pandemic teblemtsü nungi kümzüka ayutsü pai lemang lapoktsütsü. Kechiaser asen Tsüngremji tia ajak madak kibuba Tsüngrem. Anungji koba tia nung na lidir liaka asen Tsüngrem nem tenüngsang agütsütsü kanga tongtipang lir.

(2) Tsüngrem nem tenüngsang agütsütsü kuli tanabubaji, Paji taküm madak Kibur. Tsüngremi melaba agi dang asenok taküm alir, aser asenok ya pai agütsüba tangula sashirtem. Anungji taküm ya Tsüngrem meyong, aijasünung taküm alibatem ajak agi teti Tsüngrem tenüng sangtsüla, kechiaser taküm kiburji Tsüngrem lir. Asen Tsüngremji tematiba Tsüngrem aser pai pa mulungbatem inyaker, pai taküm agütsü aser pai mulungba mapang asenok dak nungi takümji bener oadoktsü, aser iba asoshi shibai pa dang question asütsü koka lir? Shingai makoktsü, kechiaser takümji pa meyong.

T. Ken 6:5 nung ashir, "Kechiaser tasü yim nung na bilemtetba maka, shibai sheol nungi na asangtsü." Taküm alibatemi dang Tsüngrem dang pelaa tenüngsang agütsütsü.

Temeim adianutem, asenok ajak taküm lir aser iba taküm ya Pa meyong, asenok ya asen sasa agi alir masü. Anungji Tsüngremi agütsüba tangula agi na taküm alir-a ta nai shitetra, ola atoka Haliluyah ta nai shiang aser Tsüngrem nem tenüngsang agüjang. Na khuret aser tetsüba aika alitsü akok, saka Tsüngrem nem tenüngsang agüjang kechiaser na dang aliba taküm Kiburji ne Tsüngremji lir.

(3) Tasembuba kuliji, Tenüngsang agütsüba jagi takok dangi anir.

"Aser pai nisungtem den o tongteper külen, temeranger telok jakdang, temeshi sübütsü sübur kibuba dang ken atentsü aser tenüngsanga, "Kibuba nem

tenüngsang agüjang, kechiyung pa yimlibilem teti alir," ta parnok aodang ashitsü pai shimtet, aser parnoki kodang ken atentsü aser tenüng sangtsü tenzüker, parnok anema aruya aliba Amon, Moab, aser Seir tenem chirtem anema kibubai arü mena atadoktsü, angji parnok tongpang chirepdoktsü." (II Puti. 20:21-22)

Kodang Israel nungertem kanga tashi tulu aketba sepai Amon, Moab aser Seir tenem chirtem den tongpang raratsü ajuruteper, par lenir Yehoshafat-i anir Israel nungertemi Tsüngrem nungsang ken tena, Tsüngrem nem tenüngsang agütsütsü tenzüker. Tsükchir agi meketbanger alidanga Tsüngrem nem tenüngsang agütsütsüpai parnok asoshi tongtipang liasü. Aser kodang parnoki Tsüngrem nungsang ken tena Tsüngrem nem tenüngsang agütsü, tsükchir ket nungi Tsüngremi parnok kümzüker.

Ano, T. Mapa 16:25-26 nung züngdanga yangji tatalokba ka angutsü, kodang Paul aser Sila tepuokdak liasü tenati ammag tireprong (Ayaterm) nung saker Tsüngrem tenüng asang aser kodang tenati Tsüngrem nem tenüngsang agütsütsü tenzüker, Tsüngrem tashi tulusangi tepuokdak lapoktsü aser talenba ajak salar chiok. Tenüngsang agütsüba nung teti takokba lir.

(4) Pezübuba nung Tsüngrem nem tenüngsang agütsütsü kuli kaji, Shirnoki Tsüngrem nem tenüngsang agütsür aser pa dang meimer parnok asoshi Tsüngremi tajung inyaktütsü. Laishiba nung repringdanga tanü asenoki ajangshiba pandemic nung ya-a tajung adoktsü Tsüngremer tenangzüka lir.

Tsüngrem o nung yamai ashir,

"Aser Tsüngrem meimertem shirnok pai mulungba ama ja-a lir, parnok tsüngdang mapa ajak külemi tajung asoshi inyakteper ta asenoki meteta." (Rom 8:28)

Tsüngrem meimertem asoshi tajungtibaji pai meteta kar, anungji shirnoki pa dang meimer aser pai mulungba inyaker, parnok asoshi pai tajung meinyaki kodanga malitsü. Tsüngremi jatetba nüburtem asoshi Tsüngremer nükjidong kaka lir. Shirnoki Yisu Khrista dak amanga Tsüngrem nem pei taküm bendanga agütsür, item jagibo teraksatsüba tashi ajuruaka idakji Tsüngremer nükjidong tajung kaka nguteter. Covid 19 pandemic dak ya Tsüngremer nükjidong raksatsütsüba tashibo mali, anungji Tsüngrem dang meimer aser Tsüngrem nem tenüngsang agütsüba takümtembo iba tashitak nungia kümzüksü pa dak tashi lir, kechiaser mapang balala aser tia balala nung Tsüngremi pa meimba chirtem dang pa tashi tulu jongkai adoka sayur, aser tanü asenok dak ibaji ataloktsü. Anungji Tsüngrem dang meima pa nem tenüngsang agütsütsü kanga tongtipang.

(5) Tatemsa Pungububa kuli ka shinüba, Tenüngsang agütsüba nung Tsüngremer sayatenya tena lir anungji tenüngsang agütsütsüla.

Yohan 11:41 nung, Yisu Khrista Lazar leper züngdang nokdaker mezüng Tsüngrem nem tenüngsang agütsü aser Tsüngremer sayatenya nung Lazar shia aru.

Yisu Khrista ano yasete aliba lokti tulu tsüngdang amtsük 5 aser angu 2 amer Tsüngrem nem tenüngsang agütsü aser iba jagi nisung meyi aika chiyunger talila aika anüng (Yohan 6:9-12).

Tanü tensa nung, alima asoshi Tsüngremer sayatenya nungdaker. Meimchir tashi kija agibo makok nung, taküm mezüngdangtetit covid 19 tashitak agi asür. Idakibo Yisu Khrista tenüng nung dang takokba lir, Tsüngrem nem tenüngsang agütsüba ajanga Pai asenok rongnung sayatenya inyaktütsü.

## III. ONÜK TEMBANG

Temeim adianutem, tanü ama tensa nung nai ajangshiba tia balala dak ajemdaker, Tsüngrem nem tenüngsang agütsütsü asoshi nai saksaka bilema alitsü akok. Kechiaser iba Pandemic ajanga na mapa makai kümdakatsüogo, pokyimdak maka, sensakmenüka kümogo, ne sentongtema ajak amajok kümadok, kecha meimyakteter, tazüngertema ne studies continue mesüteter, shirangertema hospitali doctor bushia aotsü tsüburji tashitak tuluba kümdakja pei kidang timtemteper, lokti tekülemi oner saka tensa agi memelaba agi temulung shirangseta külem amangbapurtem den majurutepteti suidoktsür, ne senti mapang aser rongsen ajak iba pandemic nung samadoktsür. Ano ibala mesükba tia aika nung na timtema alitsü südi, aser iba ama tia ka nung na lia Tsüngrem nem tenüngsang agütsütsü kanga asoshi tasak ta bilema alitsü akok. Ajisaka, iba ama tensa tia ka nungia asenoki Tsüngrem nem tenüngsang agütsütsü lemang bushitetsü nungdak, kechiaser koba tia ka nung na lidir liaka, Tsüngremi Pa ne den teti lia yaritsü nangzüka lir.

Pai asenok jangjaa meteta lir. Nai ne indang metetba dang nungi pai ne indang metetbaji tejangjaba kechiaser ne taküm nung kiburji Tsüngrem. Taküm kibubai ashir, Tia ajak nung Tsüngrem nem tenüngsang agüjang kechiaser tenüngsang agütsüba nung takok lir. Asen Tsüngremji tematiba tashi, aser alima nung tia ajakji pai ameta lir, anungji pai memeteti alima nung kecha mataloker. Nükjidong ka asoshi Corona Virus ya alima nung pai mela, aser ni amanger pa nükjidong ataloker külen iba Covid 19 tashitak ya-a asenoki koka adoktsü.

Shisadanga, advance countrytem nung meimchirtem paikati tasüba agi samaaka, tanü tashi asenokbo Tsüngrem tashi agi kümzüka lir. Anungji Laishibai melaba ama asenokbo Tsüngrem nem tenüngsang agütsütsü asoshi kuli tajung aika lir, anungji tanü tensa Covid 19 pandemic agi kangshia liaka, asenokbo Tsüngrem nem tenüngsang agütsütsü. Asenoki aji inyaktetra na koba tia nung lidir liaka idakji ne den Tsüngrem adentsü aser na yaritsü. Tsüngremi Pa o ajanga tangashir ajak moajang. Amen.

(Iba onük ya, 28th June 2020 Dimapur Ao Baptist Arogo Deobar kibong tekülem nung jembitsü asoshi renemba onük alitsü.)

## ANOGO ABEN TSÜNGREM DEN

### LENISÜBA TANELA

"Ochi Tanelai nenok ajak ochiba dangi anitsü." Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesülir idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioksütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok

nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladoktsütsü makok.

Pauli 1 Tesalonika 5:19-22 nung Tanela remsepdoktsüba mapa asem sayur.

1) Sayutsüngiba mezüngmeshi masütsü

2) Ajak tendanger tajungba ametang

3) Tamajung kechisarena nung pilaa liang. Tesalonika arogo nung Grik nung süngranglu külemba yima tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentensi sayutsüngidang sayutsüngiri mezüngbuba onük nungji aibelener. Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaksüra, aser asenok dak aliba Tanelaji remsemdoktsür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülu aser jembir, ochiji lapokang, Na sapi lir, Temeshi Kaketji lapokang! (Charles Wesley, 1707-1788).



**OLONG PAITEP # 5503**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

<b>TIPLIN</b>		<b>LANGTSÜNGLEN</b>	
2. Teburtemi tejak nung awaba	- (8)	1. Temejangdak	- (6)
6. T _ _ _ em	- (3)	3. Nisung ka mapa inyaksü nübo-	(4)
8. Tzük ayudak	- (3)	4. Azüntsü asoshi mejemba	- (6)
9. Nüngdakba dang timba	- (6)	5. Tesangwa agütsüba	- (5)
11. Züina ao	- (4)	7. Tila masü	- (4)
12. Yangi tzü angur	- (5)	10. Tebenjem tetsür chanu	- (4)
14. Tangar dang nungi tali	- (4)	11. Tekolak nung inok	- (4)
16. Senyong masü	- (6)	12. Tetsüngda	- (6)
17. Oadokdi	- (3)	13. Tangar inyakba ka inyak	- (6)
18. Tzü tarok	- (3)	14. Tim masü ta ashi	- (5)
19. Yimtaklir aikati iba ya Ki den külemi yanglusemer	- (8)	15. Asalendong	- (4)
		16. Tanüangtsü	- (4)

**OLONG PAITEP # 5502 TELANGZÜBA**

<b>TIPLIN :</b>		<b>LANGTSÜNGLEN :</b>	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. Teronem,	
14. Ola, 16. Talak, 17. Mazük.		12. Sempa, 13. Jahaz.	

**KOMA SÜLA TELANGZÜBA**

Q. Covid-19 tashidak wara aliyonga, asen lima nung dokan lapokba mapang ya akhi ama anepdang anüdok mapang nungi nikongdang anülu tashi lapok nunga koma süla ?

Covid19 tashidak ya asenok den kobika alitsü asenoki memetet, anungji asenok ajaki RULES AND REGULATIONS ji shitak benshitsüla...kechiyung dokang ji melabok nungbo Naga nunger economic nung pei memeneptsü, anungji na aser ni civilized asütsüla. Anungji nibo business ji ajak lapok nungbo kanga ajungji ta bilemer

-Along Jamir, Akhoya

Asenok Nagaland-a mali mali ta tangbo asen senso bendanglen nungi arurtem COVID19 tashidak aliba putetter joko 200 dak tema tutaki. Saka tasübabo tanü tashibo mali. Aser parnok asen Town atongba den külemi Quarantine-i yoker. Yimtung nung mesüra pei kidangi shinga meyoker aser senzütsü memelar. Anungji hopta nung shishitsü anogo asemnü dang melaa aliba ya anogoshia lapok nungang shishirtema kangabo menungteptsü aser tetsüngda lia shishitetsü ta tebilemba nüburtem den lemsateper.

-S.T. Ao Mkg

Covid-19 tashidak wara ya anepdang yakta aser nikongdang sülen ang balaka menateper ka mesüra dokantem akhi ama lapok tajungba. Idangjiang nüburtem tashidak mena-a dokan nung menungtepi pei mapang nung shishitetsü ta bilemer.

-SMS

Nai asüngdangba ya shidak lir. Saka, asenok Naga nunger tajungtem yagi ozüngtem angar-mangar? Tajungtsü majungtsü ajak Naga nungeri meteta lir nung ozojang ngasa-ngatemjang asüba agi mapa ajak majunger aser ibaji memelenshi tashi, Naga nunger kodanga junga makümtsü!!

-A.I. Imchen, Dimapur.  
(Maneni tapak 9 nung...)

**TANÜBO NAI LANGZÜANG**

Q. Koba ajanga Advanced Torpedo Decoy System - Maarech design süa yanglu?  
 A. HAL  
 B. Naval Science & Technological Laboratory (NSTL)  
 C. Naval Physical and Oceanographic Laboratory (NPOL)  
 D. B&C  
 \_\_\_\_\_ (Taruba adok nung onoki langzüksü)  
**YASHI ADOK TELANGZÜBA : 2013**

**NAI-A YA METETTER MA?**



Tesüiba anogo ishika tejakdang, Tamil Nadu kübok Rameswaram tzüküm nung Shiva Linga ka ngutet. Iba Shiva Linga ya Ramanathaswamy Temple indang anüdoklen tzükümstsütsü Agni Teertham nung angu, ta sangdong ajanga metetdaksü. Alima nung Ramanathaswamy Temple indang corridor ya talangtiba asütsü aser iba corridor tsüngbang ya nükdang 1,212 agi tangeta lir.

**SUDOKU # 5544 TELANGZUBA # 5543**

	8	3			2				3	9	5	4	2	6	7	8	1
		9	4			6			8	4	7	9	1	5	3	6	2
5			9			3			2	1	6	3	7	8	5	9	4
1			8			3	2		5	2	3	1	4	9	6	7	8
6		2		3	4				7	6	1	2	8	3	4	5	9
4			5	2			6	7	9	8	4	5	6	7	2	1	3
3	7	1	2						1	5	8	7	3	4	9	2	6
9	2					7	4		4	7	2	6	9	1	8	3	5
8			1	6					6	3	9	8	5	2	1	4	7

**OJANG LUTEP # 5092**

SÜTEIBA :

MANAPG :

ALOTAKBA :

EMATA :

TASASASE :

KAZMAÜI :

TIBTUNAJGA :

SHILEMENA :

SÜIAKNYT :

RAMENGNGA :

**OJANG LUTEP TELANGZÜBA # 5091**

ASENOKI KOMAKA ATONGTETA TIYAZÜ JEMBI YONGJIA  
 OCHI ATEMA SENTSÜHTSÜR AKÜMER

**TAN HOPTA ATEMA - KOMA SÜLA ?**

Q. Covid 19 tashidak wara poktetba ajanga asen nisung bendanglen lia alirtem meyipa arurtem ya tanaben meyipa moi asen lima nungsa ali nunga koma süla ?





New Delhi, June 27, 2020: Honibarnü New Delhi nung Congress lenir tain, Ahmed Patel'er kima par kidang inyaker staff tem nokdaka aliba noksa nung angur. Sandesara brothers senotsü dak sendakba ochimashi ken o nung Honibarnü Enforcement Directorate (ED) team ka Patel'er kidangi arua pa dang asungdangyaogo.

### India nung Covid case lakh 5 dak tema jungogo aser 15,685 süogo

**New Delhi, June 27 (Agencies):** Tesüiba ghonda 24 tsungda India nung ano nisung 18,552 dak coronavirus tashidak putet, aser ibaji densemabo tang tashi nung India nung nisung ajak agi lakh 5 dak tema dak coronavirus puteter, ta Honibarnü Health Ministry-i metetdaksü. Linük nung nisung ajak agi 5,08,953 dak coronavirus tashidak putetogo aser iba tashidak agi asür ajak agi 15,685 jungogo. Tang India nung coronavirus tashidak agi teshirangdakpur 1,97,387 lir aser iba tashidak agi shiranger 2,95,880 bo anepadokogo. "Tang tashi nung iba tashidak agi shiranger shilem 58.13 bo

anepogo," ta Health Ministry nungi tongti ketdangser kati metetdaksü. Tesüiba ghonda 24 tsungda linük nung iba tashidak agi nisung 384 asü- Maharashtra nung 175 asü, Delhi nung 63, Tamil Nadu nung 46, Uttar Pradesh nung 19, Gujarat nung 18, Haryana nung 13, Andhra Pradesh nung 12, West Bengal nung ter, Karnataka nunga ter, Telangana nung tenet, Madhya Pradesh nung pezü, Punjab nung ana aser Jammu & Kashmir, Chhattisgarh, Bihar, Rajasthan aser Uttarakhand shia nung kaka asü. India nung coronavirus tashidak putetba shilem 85.5 bo state 8 kija nungi lir aser linük nung iba tashidak agi asürtem

shilem 87 bo item states nungjagi lir, ta Group of Ministers (GoM) on Covid-19 17buba senden nung metetdaksü. State 8 ji Maharashtra, Tamil Nadu, Delhi, Telangana, Gujarat, Uttar Pradesh, Andhra Pradesh aser West Bengal state tem lir. June 27, anepdang 8:18 ako tashi nung alima nung nisung ajak agi 9,633,157 dak coronavirus tashidak putetogo aser asür ajak agi 4,90,481 jungogo. Alima nung iba tashidak agi tamajungtiba kongshiba linük pezüji US (2,407,590 case) Brazil (1,228,114), Russia (6,20,794) aser India (5,08,953) lir.

### Gurugram nung süngko jenti aruba sülen Delhi sorkari senden ayonga amen

**New Delhi, Aami/June 27 (Agencies):** Honibarnü süngko jenti aruba ajanga Gurugram yimti ajak mangmanga aküm, ajisüaka süngkoji linük yimtiba, Delhi bo matongtsüa akok, ta ketdangsertemi metetdaksü. Süngkoji Delhi-Gurugram arrtsülen anüing nung kilometer ana dak tali liasü, aser ibaji ajanga yimti mangmanga aküm. Osangbener den jembidang Ministry of Agriculture kübok Locust Warning Organisation nungi K L Gurjar-i, "Süngkoji anüolen nungi antüdokleni arua anüingdang 11:30 ako meta

Gurugram yimti atong," ta metetdaksü. Süngkoji Haryana kübok Palwal tsütsüleni ao, ta paisa shisem. Süngko jenti arua süngdong, kilem aser aonsotsü nung atem, aser Gurugram nung alirtem aikati item videos tangoka social media nung prokshio. Iba osang nung ajemdaker Delhi environment minister, Gopal Rai-i rongdak senden ka ayonga amen. Iba dak sendakba nung Minister-i ketdangsertem dang kanga kümküma alitsü tuyuba den külemi Agriculture department

nungi ketdangsertem dang Gurugram nung aliba alutem semdanga tensa asadangan ta tuyu. Iba senden nungji development secretary, divisional commissioner, director, Agriculture department aser South Delhi o West Delhi naprongla nungi district magistrates aden. Taoba ita, May nunga süngko million aika Rajasthan tonga aruba sülen Punjab, Gujarat, Maharashtra aser Madhya Pradesh nung alu jenti raksaja liasü.

### PM-i yimjak nung China aitsütsüla: Kapil Sibal

**New Delhi, June 27 (Agencies):** Ladakh nung China-India tsungda sepaitem raraba tatalokba dak sendakba nung Ato kilonser, Narendra Modi aija Congress lenir tain, Kapil Sibal-i, Ato kilonseri LAC (Line of Actual Control) onük nung pa tangatetba metetdaksütsüla, aser yimjak nung China-i telatetba anema inyakba atema aitsütsüla, ta takhangba agütsü. Kapil Sibal-i, tesüiba küm trok tashi Narendra Modi sorkar mapang nung India-i tanga linüktem den tesendaktep ayuba nung tamakok tuluba nguogo, ta ashi. "China den LAC onük latettsü atema kera inyaksüla. Ato kilonseri nüburtem meratatsüsa sangdong agütsütsüla aser yimjak nung China nung aitsütsüla," ta

Sibal-i ashi. "Kari danga India nunger litsü atsünga agira onoki parnok meyipa yoktsü, ta (Ato kilonseri) nangzüktsüla. Nai yamaji shira nübur aser opposition ajaki na nungittsü," ta pai ashi. Honibarnep taoba mapang Union Home Minister, P Chidambaram-ia twitter ajanga satellite noksa balala lemsatop. Item noksa nungji LAC nung China nunger aser India nungeri kiojen amenokba noksa lir. "May 22 aser June 22, 2020 tsungda India-China arrtsü nung tetsüingdaji medemdangan," ta Chidambaram-i ashi. Tawa satellite noksa balala ajanga Galwan valley nung LAC tesem anatsülen China nunger kiojen aser sepai garitem aika aliba noksa prokshia liasü.



New Delhi, June 27, 2020: Honibarnü New Delhi nung Group of Ministers on Covid- 19 senden tembangba sülen Union External Affair Minister, S Jaishankar aser Union Civil Aviation Minister, Hardeep Singh Puri na tangokba noksa nung angur.

### Covid-19 treatment atema dexamethasone mozü bendenlokogo

**New Delhi, June 27 (Agencies):** Coronavirus tashidak agi shirangertem treatment atema Honibarnü Union Health Ministry-i kanga bulua amshiba mozü-d e x a m e t h a s o n e bendenloksemogo; iba mozü ya jenjang kanga dalang. Protocol tasenba nung coronavirus tashidak agi mejungi shirangertem yaritsü atema methylprednisolone melen dexamethasone amshitsü tuyuogo. Kuli jangjaba den külemi mongintem dang nungi shisa agia iba telemetba agiogo, ta Health Ministry-i metetdaksü. 'Clinical Management Protocols for Covid-19' ajanga ashiba agi, dexamethasone mozü ya tepokpok infections atema amshir, aser iba ya tang tamshidak methylprednisolone melen amshitsü akok. June 13 nüa health ministry-i emergency atema antiviral mozü-remdesivir amshitsü tuyua liasü. Health Ministry-isa coronavirus tashidak agi mejungi shirangertem masü saka iba tashidak agi tera shirangertem atema hydroxychloroquine amshitsü tuyua liasü.

Treatment protocols tasenba nung anogo asemnü tashi methylprednisolone mozü 0.5 nungi 1 mg/kg tashi amshitsü mesüra dexamethasone mozü 0.1 nungi 0.2 mg/kg amshitsü, aser item mozüji mozükidang admit asüba sülen ghonda 48 tsungda amshitsü akok mesüra oxygen taliba nungdakba mapang nung amshitsü akok. Tangu sashiba tsütsü mechanical ventilation nungdaka shirangertem nem anogo 5-7 tsungda anogoshia methylprednisolone 2mg/kg/ mesüra dexamethasone 0.2 nungi 0.4 mg/kg tashi dose ana lemsar agütsütsü akok, ta Ministry-i metetdaksü. India nung nisung ajak agi lakh 5 dak tema dak coronavirus tashidak putetba anogo nung health ministry-i treatment protocols tasenba sangdonger. WHO-i ashiba agi, corticosteroid dexamethasone ya United Kingdom nung aliba national clinical trial 'RECOVERY' nung coronavirus tashidak agi shiranga hospital nung amongertem dak tendangogo aser iba mozü ajanga kanga mejungi shirangertem kanga ajangzükba kuli nguogo.



Coimbatore, June 27, 2020: Honibarnü Coimbatore nung osangbenertem senden ka nung smart robot kati Coronavirus tashidak tendangtsü atema swab samples bendena sayuba noksa nung angur. Iba robot ya Karthi Velayutham-i yanglu.



### MOLUNGNEN O



08.08.1928-17.06.2020

"Taküm Alibaji Khrista aser tasütsüji tajangzük lir" Filipi 1:21

Asür Lanu Imchen Chirnur kibongtemi; kija, kibong aser lokti shirnokisa onoki meima aliba tzurapur shiranga alidang aser alima nungi pila aoba mapang Sarasadem, Rongsen, aser Tsüngdong tonga arua Nebo agi yaritepogo nenok ajak dang kanga pelaba metetdaksür.

Onoki Dimapur Ao Baptist Arogo dang mejeta kanga pelaba lemsateper. Tsüngremi nenok ajak talubosa meyipa moatsütsü aji ozü sarasadem.

Kinungertem.

### Tenüngsang Agütsür

Miss. Yangerjungla Pongener, D/o Mr. Lanusungkum & Mrs. Tialemla, 2020 HSSLC tatidang nung St. John Higher Secondary Residential School Dimapur nungi Science Stream top 6th nguteta yimer nem tenüng tajung bener arutsüba asoshi Village Council Changki ajanga tenüngsang tulu agütsür. Tarutsü anogotem nunga takok tajung ngutetsüsa Tsüngremi yariang ta sarasademtsür.

Iba den ano shirnokisa HSSLC/HSLC taidang nung takok nguogo, nenok ajak nem tenüngsang agütsür. Nenok tazüngba wadang nung maneni takok nguteta pei nükjidong tongtetba kaketshir



Sd/- Lendimenba Amri Chairman

Sd/- Imodangba Pongener Secretary



## FOR SALE

Use children's outdoor play house with Pit and Ball

**Rs. 55,000 (fixed)**

Gravity Mokokchung Show Room

- Timing -  
9:00 AM to 2:00 PM

Tuesday / Thursday / Saturday



## Israel nung rocket ana khaloktsü; IDF-i Hamas amak

Gaza, Aami/June 27 (Agencies): Israeli military-i sangdong ka ajanga ashiba agi, Gaza Strip nung Palestine nung rocket ana ya tsüka apok.

Israel-i, Yordan lenden densema West Bank atsüngtsü asoshi sentong yanglur aliba ajanga Palestine nung litsü nung tensa mejungi kümogo, aser parnok mesüngjemteti lir.

Iba sentong ajanga Palestine nung West Bank, Gaza Strip aser Jerusalem anüdoklen state ka amenoktsü asoshi timla aliba raksatsütsü.

Brehostibarnü Hamas armed wing-i, Israel-i sentong yanglur aliba ama parnok aliba tesem atsünggra, azütokshi lendong tulu

amokmerenba sülen anogo ka lir rocket ana ya khaloktsü, saka Israel nung moapu tesadem nung dang rocket ana ya tsüka apok.

Israel military-i ashiba agi, tayimtsü agi Hamas pur indang facility ana amakba ajanga parnok tashi ajema kümdaktsütsü.

Israel-i, Yordan lenden densema West Bank atsüngtsü asoshi sentong yanglur aliba ajanga Palestine nung litsü nung tensa mejungi kümogo, aser parnok mesüngjemteti lir.

Iba sentong ajanga Palestine nung West Bank, Gaza Strip aser Jerusalem anüdoklen state ka amenoktsü asoshi timla aliba raksatsütsü.

Brehostibarnü Hamas armed wing-i, Israel-i sentong yanglur aliba ama parnok aliba tesem atsünggra, azütokshi lendong tulu

adoktsü, ta amokmerenba den iba amala jenjang agiba ya tongpang ayongzükba de kasa lir, ta ashi.

2020 küm mezüngbuba shilem nung Gaza-Israel arrtsü süngjema liasü, kechiyong Hamas puri hopta tatem shia longkak aitba sentong ayongzükba agia aliba anentsü, koba aiben asütokshi nung tembanga liasü. Coronavirus tashidak poktetba ajangaa yimjung nung lia aruogo.

Honibarnü Gaza nung sensakser kibong 100,000 shi nem Qatar-i USD 100 tenla agütsütsü, ta osang ka ajanga metetdaksüogo. Persian Gulf nung aliba takar linük-i, küm ka shi yimjung nung iba tesem toktsütsü aser Hamas o Israel na tongbang ayongzükba raratsü aliba nokdangtsü asoshi tenla agüja arudar.

## Anti-graft body-i Sharif anema ken o benok

Lahore, Aami/June 27 (Agencies): Pakistan nung anti-graft body-i taoba Ato Kilonser Nawaz Sharif aser tangar nisung asem anema ochi mashi ken o ka benokogo. Küm 34 tejakdang Punjab province nung ozüing alema ali agütsüba dak ajemdaker iba ken o benoka liasü.

Arishi küm 70 tain taoba PM aputsü asoshi tetuyuba agütsüogo, shiba tang London nung temang anepaludar.

The National Accountability Bureau (NAB)-i anti-corruption court den tongtepratepba sülen Sharif ya tetuyuba sülen manidaker ka ta sandongogo, kechiyong pai pa jaokba dak sendakba nung khendang telangzüba agüja mali.

NAB ken o benokertem rongnung Jang/Geo media group kibur Mir Shakilur Rahman, taoba Lahore Development Authority (LDA) director Humayun Faiz Rasool aser taoba director (land) Mian Bashir densema lir.

1986 küm Sharif, Punjab chief minister inyakba mapang pai Lahor nung 54-'kanal' (canal) ali ozüing alema Mir Shakilur Rehman nem temelaba agütsü.

Rahman, shiba March 12 nü puogo, pa judicial ket nung lir.

Sharif aser tanga ketdangser anati pei tashi mashiyimi amshia canal den atonga aliba senti ali ya ozüing alema Rahman nem bendanga agütsü.

Lahore High Court-i bendanglen oa temang anepalutsü asoshi Sharif nem hopta pezü temelaba agütsüba sülen, pa November ita London-i ao.

Pai, pa senzüsenpongtsü asoshi tema anema lir ta doctor-i shili Pakistan-i meyipa arutsü, ta shi court nem osang ka agütsüogo.

Taoba ita Sharif, par kinunger ka den London cafe ka nung süngo jema aliba noksa ka ayimsünga prokshia liasü, aser iba ajanga pa health dak sendakba nung mepetmesü

adok aser Pakistan Tehreek-i-Insaf party züngsemtemi pa obendangtsü asoshi meyipa anir arutsü khangogo.

Noksa nung pa lenmang tezülen aliba café ka nung par senchir den mena aliba nguogo. Pa blue shalwar kameez ka aser korang ka semer liasü aser pa temang tejungtuba kümer ama reprangtetogo. Al-Azizia Mills ochimashi ken o nung Sharif nem bail agütsüogo. Iba ken o nung pa küm tenet atema tepuokdak munga liasü.

Maneni bendanglen oa temang anepalutsü asoshi, senotsü ochi meshi amshiba ken o nung pa aitsür aliba atemaa bail agütsüogo.

Sharif dak temulungjang tashidak balaka aliba potetogo. Par jala Maryam Nawaz-i ashiba agi, tebu ya high-risk patient ka lir, anungji pa cardiac catheterisation/coronary treatment agitsü aliba ya coronavirus tashidak pokteter aliba ajanga thinena lir.

## Rohingya nung 4 Bangladesh police-i khaset

Dhaka, Aami/June 27 (Agencies): Sen meshia agitsü asoshi nisung pur aoba nung densema alitsü ta temulung melemba Rohingya nung telok ka nungi züngsem pezü Bangladeshi police-i khasetogo. Myanmar nungi jena arur refugee tem aliba camp anasa khatapba sülen police temi parnok pezü ya khaseta liasü, ta ketdangser kati metetdaksü.

Hokolbarnü police temi Cox's Bazar nung Rohingya camp anasa arem nung iba telok lenir bushiba mapang telok ana tsüngda khatapa liasü, ta police Inspector Pradeep Kumar Das-i ashi.

Inspector-sa, Morzina Akhter-i ashiba agi, temulung melemba bilemertem yagi police dak injang khaloktsü aser iba ajanga telok ana tsüngda khatap tenzük aser nisung pezü tashi khaseta liasü. Police-isa, temesepba mozü süngjang 40,000 aser local prangbong tem nguteta liasü, ta pai ashi.

Ketdangsertem aser local media sangdong ajanga ashiba agi, iba telok lenir Abdul Hakim yagi local tem aika pua bener oa sen meshia liasü aser sen magütsütetter tepseta liasü. Pai ita ana tsüngda Bangladesh nung tenet purogo aser nisung asembo khasetogo. Hakim ya tang tashi monguteti bushidar.

Human rights teloktemi Rohingya nung refugee tem rongnung ozüing raksartema lir ta agizükogo saka kasa mapang nung ketdangsertem dang iba ken o kanga junga bushitsüngdangtsü asoshi khangogo.

March iya police temi, tesemsepba mozü aser nisung shibelenshiba nung densema alitsü ta temulung melemba telok ka nungi züngsem tenet khaset.

2017 küm August ita Myanmar minitary-i Rohingya Muslims nung amak tenzükba sülen parnok 700,000 dak tema pie ki toktsür Bangladesh-i jena ao.

## Nepal arrtsü nung lenmang takaratiba nung yanglutsü

Katmandu, Aami/June 27 (Agencies): Darchula district kübok Ghanthibagar anasa Mahakali corridor mesera Darchula-Tinkar Road Project nung km 87 talang lenmang ka takaratiba nung yanglutsü asoshi Nepal sorkari Army teyari meshiogo.

Sorkari taoba ita iba lenmang yanglutsü asoshi Nepal Army nem nongloksütsü atema telemtetba agia liasü, ta Economic Times sangdong ka ajanga metetdaksü. Iba lenmang ajanga China den tajungba sendakteptetsü, koba Tinkar adena orr lir. Lenmang takaratiba nung yanglutsü asoshi nükjidong ayuba ya, Nepal nungertem India nung lenmang dak metaloker malitsü asoshi lir.

Ajisüaka iba lenmang ajanga lisopurtem India arrtsü madeni pei yimtsüngi aotsü asoshi lenmang sadema lapoktsütsü aser kasa mapang nung Nepal army patrolling tayongba kümdaktsütsü.

"April 26 nü senden amenba

mapang minister temi hadir teperi bener Nepal Army senction ka iba km 87 talang lenmang ya yanglutsü asoshi telemtetba agia liasü. Iba lenmang kübok kadu senzüba lenmang ka aittsü, koba meter 2 tulu aser meter 450 talang lir," ta Nepal Army-i sangdong ka ajanga ashi.

"MauriBer aser Ghanti tsüngda lenmang meter 450 ya army-i lapoktsüba sülen iba tesem nung alir 1,200 shi India adena mesenzüi Nepal nung litsü ajang dang pei yimtsüng tonga otettsü" ta kasa sangdong nung shia lir.

India aser Nepal na tsüngda tesendaktep mejungi akümba mapang ka nung tang lenmang yanglushitsü asoshi tenzükogo. Nepal Parliament-i tawa yanglushiba map nung Uttarakhand kübok district kar parnok litsü nung inoksema yanglur sayuba sülen linük ana tsüngda mangatettep adok aser iba ajanga artsü nung aliba nüburttem lendong nung toktsüogo.



### Tuensang DTF COVID-19 senden amen

**Tuensang, Aami/June 27, 2020 (TYO):** Hokolbarnü, Tuensang DC conference hall nung Tuensang District Task Force for COVID-19 senden ka ayonga agiogo. Iba senden nung Deputy Commissioner aser Chairman DTF, Kumar Ramnikant, IAS mendenti liasü.

Iba senden nung teloki, Truenat machine tem atema cartridge tem alioka ayutsü jembishinü aser anogo ishika tsungda district-i cartridge talila tonga arutsü aliba indang osang-a metetdaksü.

Tekümdangtsü meratem agir ama aser iba den külemi COVID-19 dak sendakba nung tejak nembangba mask inokba, glove semokba, lokti nungi pilar alitsü indang tongtibangtem nübur dang sangdongtsü asoshi Honibarnü - June 27, 2020 Tuensang jila kübok shishilembaba dokan kibur tem dang iba sentong pusema aser mulungsoa iba anogo dokatem shibangtsü asoshi parnok dang mepishitsü ta teloki bangzüngtep.

Ajisüaka, nungdakba service tem, agri dak sendakba maparen, pharmacy aser petrol pump tem lapoktsü akok.

District nung ajungbenaka, coronavirus tashidak agi shiranger timba kümra, tashidak puteta alir saka tashidak temaitsü mesayur tem ayutsü asoshi COVID 19 care centre ka lapoktsü atema teloki jembitepa liasü.

Kasa senden nung, teloki-sa DTF indang inyakyimtem aser tanga tesem nungi arurtem, shirnok dak COVID-19 tashidak meputet aser iba den külemi inyakyim agi melaba ama quarantine centre nung anogo abensa amungertem pei pei kidangi yokadoktsü dak sendakba onüktem nung ajemdaker asadanghia olemtepa liasü, ta sangdong ka ajanga metetdaksü.



Mokokchung, Aami/June 27, 2020: Temiem aser pelaba temaitsü sayua, Honibarnü (26.06.2020) Mokokchung kübok COVID-19 nung yaritepertem talisa DC, SP,CMO aser IMDH nung nisung 300 shi Adventure and Motor sports Association Mokokchung (AMAM) züngsemtemi chiyongdakja liasü.

### KOMA SÜLA TELANGZÜBA

**Q. Covid-19 tashidak wara aliyonga, asen lima nung dokan lapokba mapang ya akhi ama anepdang anüdok mapang nungi nikongdang anülü tashi lapok nunga koma süla ?**

**(Tapak 6 nungi...)**

Covid tashitakji hopta nung anogo tena tena ah marur mesüra anepongi mesüra aonung menura marur ta ajaki metetsüla. Iba dak ajemdaker tang leniri telemtetba agitsüla!

-SMS

Tsüngrem temeim agi asen limabo Covid agi tongaka tasüba mali saka tanepba tang anungji Govt. aser Medical-i kechi koma teküzmüksü indang tuyua lir. Itemji ang shidak benshira anogo piyong shishia senzuyonga kecha masütsü südi ta bilemer, kechiyong sarasadem tamang den aseni kümdangra yangji asen Tsüngremi yaritsü.

-SMS

Dimapur jila nung Naga nunger kinük ajak nung shishilembaa angudang kanga temolung asür, iba yimya mesamadaktsüli. Saka tamasa Police aser Telung nung alir azüokang! Ajiser ang Anüdok nungi Anülü tashi dokan lapok nung ajungtsü !

- SMS

Dokan lapokba mapang ya,anepdang 6am,nukongtang4pm tashi anogoshia lapok nung ajungtsu.Night curfew maneni alitsüla.

- WhatsApp

Covid 19 wara liaka asenok dokan nung oset alitsu aorteme govt e tekümdangtsu ashiba nung anidakra dokan anupdang nunge anulu tashi lapok nunga ajak atema tajungba tang sula.

-SMS

Wara aliyongbo dokantem anupdang nunge nikongdang tashi lapok nunga tajungba tang. Oset alie aorteme COVID 19 asenok ajungtsu atema agutsuba ji junga tashi angaa benshitsüla.

-SMS

### Tepela aser Molungnen O



10.07.1922

17.06.2020

Ozü tebedi akümdong tajung **Asür Zülunügsang** (Chakpa), pa mapang talangka shiranga arur 17<sup>th</sup> June 2020 anogo nung akümlü khuret ajak zep ta tempanga jala jabaso aser kinungertem ajak jepa doktsür kodanga meshilangba limai ogo. Anungji obala shirang tenzüka anogo nungi tasü lepkhu maparen tempangba tashi kija aser lokdi tentet shirnokisa yaritepogo nenok ajak tang iba osang kaket ajanga pelaba aser mulungnen O lemsateper.

**Talisa ;**

1. Chakpa Baptist Arogoi anir iba dak sendakba dept. ajak.
  2. Chakpa Medemsanger Putu Menden aser medemsortem.
  3. Chakpa Fellowship Chumukedima aser kiyongkinartem
  4. Yaongyimti New Council Chairman aser medemsortem.
  5. Kiyong kinar, kinünger anükapang, amoachi aser kimang sosemtem.
- Nenek tamang (faith) lumia sarasademtsüba aser nübo, rongsen, shisatsü aser nüken pelem ajak asoshi merasatetba tepela lemsateper. Anungji Tsüngremi nenok kija kibongtem tali moajangma.

- Temeim Kinüngtsü aser Jala jabasotem.

### Pelaba Lemsateper



ASO :  
14<sup>th</sup> Feb. 1939

ASÜ :  
21<sup>st</sup> June 2020

Ozü temeim tsürabur asur **AYUMETEN** (KHAR) mozüki balala nung shiranga anir senzüba mapang nungi tasü nü tashi kija, kinunger adianutem aser Kiyonger shirnokisa nübu, rongsen, shisatsü aser sarasadem agi yaritepogo, nenok ajak dang kanga pelaba metetdaksür.

Nenoki pei akokba tajungtiba agi yariba ajanga onok mangyim tejashi khuret ajak pongpadaktsüogo. Nenek ajak dangi tsüngdong arua pelaba meshitetaka , iba mulungnen O yagi ajak den pelaba lemsateper. Maneni Tulusang Tsüngremi nenok ajak moajang ta ozü tamang sarasadem.

Temeim Chirurtem, Semchisemnurtem aser Kinungertem

**Be a part of the team  
to achieve Air Supremacy**

**JOIN INDIAN AIR FORCE TO BE A CUT ABOVE**

Online registration through  
<https://careerindianairforce.cdac.in> or <https://afcat.cdac.in>

Last date to Apply: 14 July 2020

ENTRY	BRANCHES
AFCAT 02/2020	Flying / Technical / Administration / Education
NCC SPECIAL ENTRY	Flying Branch (Air Wing 'C' certificate is mandatory)
MET ENTRY	Meteorology Branch

Online test only for AFCAT entry

Aadhaar Card is mandatory for online registration

For more details, refer to Employment News dated 13 June 2020 and for detailed notification visit our website

Apply online through QR code

Step 1: Download QR code scanner app from Google Play store

Step 2: Open QR code scanner app and scan it.

Step 3: Open URL and click on candidate login to apply

**'DISHA' Cell, Air Headquarters, Vayu Bhawan,**  
Mottalal Nehru Marg, New Delhi-1100106  
Tel: 011-23013690, Toll Free No.: 1800-11-2448,  
Website: <https://www.careerindianairforce.cdac.in>,  
E-mail: [afcatcell@cdac.in](mailto:afcatcell@cdac.in)

**For Updates, follow us on:**

Indian Air Force Indian Air Force@IAF\_Mcc indianairforce [https://www.indianairforce\\_mcc](https://www.indianairforce_mcc)

DAVP 10801/13/0006/2021



## Serie A: Juventus-i goal 4-0 agi Lecce kokogo



**Turin, Aami/June 27, 2020 (Agencies):** Hokolbarnü Serie A football asaya ka nung Cristiano Ronaldo-i penalty ka idaktsü aser pai külem asayar Paulo Dybala aser Gonzalo Higuain naprongla atema goal ka ka yangluja Juventus-i Lecce madak goal 4-0 agi takok ngua liasü.

Iba takok ajanga Juventus-i point 69 tashi tongteta Serie A table nung point 7 agi parnoki Lazio team ajatetogo.

Arishi küm 35 Ronaldo-i mezüing half nung goal ka idaktsü maongka angu, saka pai iba goal meinoktsütet aser Lecce nungi asayar Fabio Lucioni-i asaya den mapet yimya amshiba ajitetta referee-i pa nem indang indanga red card agutsüba ajanga minute 32 sülen Lecce nungi asayar 10 agi dang asayatsüsa kümadak.

Tanabuba half tenzüker Ronaldo ajanga metsüba ball ka Dybala-i agizüka goal

idaktsüba mapang, minute 53buba nung Juventus pur goal ka agi tejakdang ser asaya. Minute 9 sülen, Ronaldo-i penalty ka metsütsü maongka ngua pai telok atema goal tanabuba idaktsü.

Juventus-i tasa tajung amshiba den külemi parnoki iba asaya tatem tashi amokbanger asaya liasü aser Lecce-ia kanga dang tasüita goal idaktsütsü asoshi Juventus pur den meranga toktep, saka mezüing half nung asayar ka tukadokba ajanga parnok asaya nung ongdang tuluka adokdaktsü aser parnoki bilemba ama masayatet.

Asayar melentepba (substitute) mapang, moapu telungi Higuain ait aser coronavirus wara tenokdangba sülen, Serie A tenzüksüba mapang nungi Juventus atema pai (Higuain) mezüing asaya liasü aser minute 83 buba nung Portugal

nunger Ronaldo-i kanga dang tasaka pa tenüklang agi Higuain nokdaka aliba tsütsü ball ji yok aser aser pai telok atema ka goal tasembuba idaktsü.

Minute ana sülen, Douglas Costa ajanga metsüketa yokba cross ball ka Matthijs de Ligt-i pa kolak agi tongokja Juventus pur atema goal pezübüba bendenloksü aser teloki iba asaya takok ngua tembang.

Italian title tukuben atonga takok angutsü asoshi meranga toktepba team - Juventus-i iba season indang asaya 28 tashi nung shilem agiba sülen, parnoki point 69 tashi tongteta Lazio ajatetogo. July 27, 2020 nü Juventus aser Lazio na tsüingda asayatsü.

Lecce-i point 25 tashi ngua table ponglanglen jenjang tasembuba nung goal tebandang agi Genoa aser point kati jenjang 16buba nung alir Sampdoria memenep lir.

## BAI-i training camp ka ayongtsü renemdar

**New Delhi, Aami/June 27, 2020 (Agencies):** Hyderabad nung national camp ka ayongtsü atema Badminton Association of India (BAI) dang state sorkari melabo taruba ita July 01 nü nungi P V Sindhu densema India nunger badminton asayar mongitemi court nung asayatsü maongka angutsü.

Taoba ita, Sports Authority of India (SAI) ajanga saisapong dak sendakba training tenzüksütsü atema ozüing latettsüba sülen Bengaluru kübok Prakash Padukone Badminton Academy (PPBA) nung India nunger badminton asayar kar training tenzüksütsü, saka Hyderabad nung badminton asayartem atema mapa mekümteti lir.

Hyderabad nung COVID-19 wara agi shiranger timba akümba ajanga, tekümdangtsü meratem agia Telangana sorkari June 30 tashi maparen ajak shibangtsü lemtet.

"Iba wara süshia maoba ajanga training anentsütsüsa aküm, saka tensa asadanga sülen state sorkar temelaba agir aser parnoki mulungra July 01 nü nungi Hyderabad nung training camp tenzüksütsü telemtetba agiogo," ta BAI Secretary Ajay Singhania-i ashi.

March ita, BAI-i April 27 nungi May 3 tashi Lucknow nung asayatsü aliba Senior National Championships thija liasü aser tang domestic asayamung taküm September ita tashi metenzüktsü atema telemtetba agiogo.

"Domestic asayamung dak sendakba nung BAI-i state secretary ajak den jembitepogo aser parnok dang asüingdangyaba sülen, taküm September ita tashi domestic asayamung metenzüktsü lemteta liasü," ta Singhania-i ashi.

India nung senior ranking asayamung tem melentsü atema, February ita BAI-i multi-level domestic tournament ka tenzüksütsü asoshi sangdong liasü, kong senpet sen ajak sentepa sen cr. 2 shi agütsütsü lemtet.

Iba asayamung ya level asem lemsar asayatsü renem saka coronavirus wara ajanga maparen kecha mekümteti sentong ajunga thitsütsüsa kümadak.

## England tour atema PCB-i asayar 10 aninogo

**Karachi, Aami/June 27, 2020 (Agencies):** Taruba England tour atema renemshia aliba mapang, Pakistan cricket team nungi asayar 10 dak anaben tashi coronavirus tashidak tejangja putetba sülen, Deobarnü parnok medeni team pur England-i ayamesoa aotsü, ta Honibarnü PCB-i jangjatsüogo.

PBC, chief executive, Wasim Khan-i ashiba agi, tashidak puteter alir asayar 10 ya ano tendanger tashidak meputetra, parnoki tanüingba squad - asayar 18 den külemi iba tour nung shilem agitettsü akok.

Iba hopta tetenzüklen parnok dak coronavirus tashidak tejangja aliba mezüing putetba sülen, Shadab Khan, Haris Rauf, Haider Ali, Fakhar Zaman, Mohammad Rizwan, Wahab Riaz, Imran Khan, Mohammad Hafeez, Mohammad Hasnain aser Kashif Bhatti nunger tanaben

tendanga liasü.

England tour nung Pakistan-i Tests aser Twenty20 international asayamung asemsem asayatsü.

London tonger, training metenzükdang, Pakistan cricket squad nungi asayar ajak anogo 14 atema takdang balala nung quarantine süa amungtsü.

Team ana tsüingda mezüing Test ya August ita Manchester nung asayatsü imlar, saka England & Wales Cricket Board-i ashiba agi, terepranger medeni asayatsü asoshi renemba anogotem mapangtongi osang agütsütsü.

Tang, Pakistan nung coronavirus wara agi shiranger timba kümдар aser tanü tashi nung iba tashidak agi shiranger nisung 200,000 jungnüa kümogo aser nisung 4,000 dak tema taküm samaogo. Kasa mapang Britain nungbo iba wara agi shiranger ajema akümba osang angazükogo.

## World Team Tennis nung Venus Williams-i shilem agitsü

**AP, Aami/June 27, 2020 (Agencies):** World Team Tennis nung 15ben buba shilem agitsü atema Venus Williams-i sign süogo, ta Bresthostibarnü league sangdong ka ajanga metetdaksü.

Taruba ita July 12 nü nungi tenzüka 'hopta-asem' season atema Anüdoklen Virginia kübok resort ka nung team tuku adenshia tokteptsü. Team tuku rongnung, Washington Kastles nungi Venus-i züingsem ka ama shilem agitsü.

Taoba küm tashi, World Team Tennis asayamung ya U.S kübok tesem balala lemsar asaya liasü, saka taküm coronavirus wara tenokdangba ajanga WTT-i iba asayamung tesem ka nung dang ayonga asayatsü telemtetba agiogo.

Venus, shiba taoba hopta arishi küm 40 jungogo, 2011 küm la dak Sjogren indang syndrome (temang nung teret teloktep ayangashiba aser temang tashimeiti aoba timtem ka) putetba sangdonga liasü. Iba mapang nungi lai chiyongtsü atema süngolemba agi melenba aser iba tashidak indang jembia arudar.

America tsür Venus-i Grand Slam singles champion tenetben tashi takok nguogo, kong Wimbledon title pungo aser U.S. Open title ana densema lir. Iba dak alia, tetsür tarep nung 14 Grand Slam takok angutsü atema Venus-i la teno Serena den külemi asaya liasü.

The Greenbrier kübok seat

2,500 aliba kima court nung tennis asaya ka repringtsü atema terepranger 500 melatsü. Ajsüsiaka, ajungbena tzüinglu arua kilung nung asayatsüsa kumra, tereprangerv timba agia nisung 250 - fans 200 aser staff 50 dang aruagi asaya repringtettsü.

Asaya metenzükdang fans ajaki tejak nembangba mask inoktsüla aser temperature tendangtsü.

Iba asayamung nung shilem agitsü atema tenüing agütsür tanga asayartem rongnung 2020 Australian Open takok angula Sofia Kenin, 2017 U.S. Open takok angula Sloane Stephens aser 16 Grand Slam doubles title takok angur jakrep Mike aser Bob Bryan nunger densema lir.

Taküm asayamung atema WTT-i senpet sen USD million 5 agütsütsü renemogo, koba 2019 season dang nungi USD million 1.5 agi timba asütsü.

Alima ajunga asüingba coronavirus aziüktsü asoshi maparen ajak shibangba ajanga, March ita nungi tenzüka ATP, WTA aser International Tennis Federation temi achayangba tennis asayamung ajak thitsüogo aser August ita telemtetba ka magi tashi tongtibang asayamung ajak thinenja atar.

Ajsüsiaka, WTT yabo item tour den sendaktepa mali, kechiyong asaya atema ATP mesüra WTA ranking points magütsür. Ibayongji, item tour telemtetba nung WTT-i anidaktsü nüngdak madoker.

### BILEMDANGANG

"Timtem jagi nü taküm sota teyudaktsü, saka ibaji tetuyuba ama agizükang."